

„ნათლის სვეტის“ პარადიგმული სახისმეტყველება ნიკოლოზ გულაზერისძის „საკითხავსა“ და „საგალობელში“

„ნათლის სვეტის“, იგივე „სვეტი-ცხოვლის“, პარადიგმა ქართული მწერლობის და, ზოგადად, ქართული ქრისტიანული კულტურის მარადთანმხლები ფენომენი და ქართველთა სულიერი ცხოვრების საზრისია.

სამეცნიერო ლიტერატურაში აღნიშნულია, რომ „ნათლის სვეტი“ გვხვდება ნეოპლატონიზმში („ნათლის სვეტი“ – სხეულებრივი, განუყოფელი და უძრავი, ყოველივეს შემცველი ადგილი უნივერსუმში), მანიქეიზმში („სინათლის სვეტი“, ანუ „დიდების სვეტი“ – განწმენდილი სულები ან ნათელი არსებები მთვარესთან და მერე მზესთან მისასვლელად მას აჰყვებიან; სხვა ვარიანტით – ნათელი ან განწმენდილი სულნი მთვარეზე და მზეზე ასვლის შემდეგ „დიდების სვეტზე“ გროვდებიან) და ინდურ რელიგიაშიც (აქაც „ნათლის სვეტი“ უკავშირდება გარდაცვლილთა სულებს, რომლებიც ჯერ მთვარეზე აღიან, მერე – მზეზე. ყოველივე ეს ინდოეთის რწმენის საუნჯეა).

ვ. ნოზაძე არც ერთ შემოდასახელებულ წყაროს ქართულ მწერლობაში გავრცელებულ „ნათლის სვეტთან“, ან „სინათლის სვეტთან“ არ აკავშირებს. მეცნიერი ფიქრობს, რომ მას „კავშირი აქვს ასსირულ-ეგვიპტურ-ბერძნულ სვეტთან, რომელიც მნათობთადმი იყო მიძღვნილი. მგონია, ქართულ სვეტს კავშირი არა აქვს ბიბლიის ცეცხლის სვეტთან“ [ნოზაძე, 1957: 87].

აგ. ნოზაძე იმორწმუნებს ჟ. კარსტის შეხედულებას, რომ „სვეტი ცხოვლი“, იგივე „სვეტი ნათლისა“, „რომელიც ზეციდან ჩამოდის, არის გაქრისტიანებული ძველი კულტი ხისა, წმინდა ხისა, რომელი კულტიც ცნობილია არამც თუ მარტო საქართველოში, არამედ მთის ხალხების წარმართული რწმენის ნაშთში“ [ნოზაძე, 1957:88].

ქართულ მწერლობაში თავჩენილი „ნათლის სვეტის“ სახე-სიმბოლოსა და სახე-იდეის არქეტიპი, ჩვენი აზრით, ბიბლიურია (თუმცა, სვეტის მითოსურ სამყაროსთან და წარმართული ხის კულტთან კავშირი უცილობელია; იხ. ი. ჯავახიშვილი, მ. ჩიქოვანი, ზ. კიკნაძე, ი. სურგულაძე, რ. სირაძე). გამოსლვათა წიგნის მიხედვით, „სვეტი ღრუბლისაა“, „ცეცხლის სვეტი“, იგივე „ნათლის სვეტი“, ისრაელის ძეთ აღთქმული ქვეყნისაკენ უძღვის – „ღმერთი უძღოდა მათ: დღისი უკუე **სუეტითა ღრუბლისათა** ჩუენებად მათად გზასა, ხოლო დამე – **სუეტითა ცეცხლისათა**. და არა მოაკლდა სუეტი იგი ღრუბლისა დღისი და სუეტი ცეცხლისა – დამე წინამე ყოვლისა ერისა“ [გამ. 13: 21-22].

მოსხმობილი ტექსტიდან როგორც ირკვევა, „ღრუბლის სვეტი“ და „ცეცხლის სვეტი“ („ნათლის სვეტი“) ერთი და იმავე შინა-არსის მოვლენებია; „თეოფანიის“ ნიშან-სვეტები, ხილული ხატებია, რომლებიც დღისა და ღამის პერიოდებში მონაცვლეობენ და უფლის რჩეულ ერს ძნელ და რთულ გზაზე წინამძღვრობენ.

„ღრუბლის სვეტი“ ეგვიპტიდან გამოსულ ებრაელებს არ ტოვებს და განსაცდელის ჟამს, ეგვიპტელების მოახლოებისას, მათ ზურგს უმაგრებს, ფარად ეფარება, ხოლო მომხდურს – გზას უბნელებს: „ხოლო აღიძრა ანგელოზი იგი წინა-მავალი ბანაკისა ძეთა ისრაელისათასა და ვიდოდა უკუანაგან, და აღიძრა **სუეტიცა ღრუბლისა** პირისაგან მათისა და დადგა უკუანაგან მათსა. და შევიდა საშუალო ბანაკსა მეგვპტელთასა და საშუალო ძეთა ისრაელისათასა და იყო აღმური და ბნელი. და წარჴდა დამე და არა აღერინეს ურთიერთას ყოველსა მას დამესა“ [გამ. 14:19-20]. თხრობა გრძელდება – „და იყო საჭუმილავსა განთიადისასა და მიჰხედა უფალმან ბანაკსა მეგვპტელთასა **სუეტითა ცეცხლისა და ღრუბლისათა** და განაწყო ბანაკი მეგვპტელთად“ [გამ. 14: 24]. როგორც ირკვევა, „ცეცხლის სვეტი“ და „ღრუბლის სვეტი“ უფლის რჩეულთა მფარველი და მხსნელია, გულმძვინვარე ფარაონისა და მისი მხედრობისათვის – რისხვა და ვაება, რასაც ხვდებიან კიდეც ეგვიპტელნი და მოწეულ განსაცდელს „ისრაელისთვის“ გამართულ უფლის ბრძოლად აღიქვამენ.

აღნიშნულთან დაკავშირებით ნ. სულავა წერს, რომ „სვეტი ღრუბლისაა“ უკანდგომა იმას მიუთითებს, რომ მათ უკან მიბრუნება ეკრძალებათ... „სვეტი ღრუბლისაა“ პირისპირ ხილვა არ შეიძლება. ხოლო, რადგან განთიადისას ეგვიპტელებს პირისპირ წარუდგა „სუეტითა ცეცხლისა და ღრუბლისადათა“, ღმერთის პირისპირ ხილვამ დაღუპა კიდეც ისინი“ [სულავა, 2008:134].

„გამოსლვათა“ წიგნში „ღრუბლის სვეტი“ კიდევ რამდენიმეჯერაა ნახსენები, კერძოდ, ეგვიპტიდან გამოსვლის მესამე თვეს იაკობის სახლი სინას მთას მიადგა, მოსე მთაზე ავიდა და ღმერთმა დაავალა, ისრაელიანებისთვის გადაეცა მისი ნება – თუ შეისმენდნენ მის სიტყვასა და აღთქმას, თავის რჩეულ ერად გახდიდა. იაკობის სახლმა მოსეს თანხმობა მისცა. ამის შემდგომ „... უფალმან ჰრქუა მოსეს: აჰა, მე მოვალ შენდა **სუეტითა ღრუბლისათა**, რათა ესმას ერსა. ვიტყოდი მე შენდა მომართ და ჰრწმენეს შენი უკუნისამდე. და მიუთხრობდა მოსე სიტყუათა ერისათა უფალსა“ [გამ. 19: 9].

მოხმობილი ნაწყვეტიდან ჩანს, რომ ერისათვის „ღრუბლის სვეტი“ უფლისჩენის მოწმობაა, რაც თავად ღვთის სიტყვითაა გაცხადებული. აღესრულა უფლის სიტყვა და „...მთა სინა მკმოლვარე იყო ყოვლად გარდამოსლვისათვის ღმრთისა მას ზედა **ცეცხლითა და აღვილოდა კუამლი**, ვითარცა კუამლი საჭუმილისა. განკვრდა ყოველი ერი ფრიად“ [გამ. 19: 18]. ირკვევა, რომ უფალი ერს ცეცხლის სახით ეცხადება. ეს ეპიზოდი კიდევ ერთხელ ცხადყოფს, რომ „ღრუბლის სვეტი“ და „ცეცხლის სვეტი“ ერთი და იმავე შინა-არსის სახე-სიმბოლოებია.

„გამოსლვათა“ წიგნში კიდევ ერთხელ წარმოჩინდება „ღრუბლის სვეტი“ – „...და ვითარცა შევიდის მოსე კარავსა მას, გარდამოჴდის **სუეტი იგი ღრუბლისა** და დადგის კართა თანა მის კარვისათა, და ეტყუნ უფალი მოსეს. და ჰხედვიდა ყოველი იგი ერი **სუეტსა მას ღრუბლისასა**, მდგომარესა კართა ზედა მის კარვისათა, და დგან ყოველი იგი ერი და თაყუანის-სცის კაცად-კაცადმან კარით კარვისა თვისსადათ“ [გამ. 33: 9-10]. „ღრუბლის სვეტი“, როგორც არაერთგზის აღინიშნა, უფლისჩენის, უფლისმყოფობის ნიშან-სვეტია. ამ გზით უფალი ეცხადება მოსეს, ამ გზით ამცნობს მას თავის ნებას და ისრაელი ღმერთს ამ სასწაულით ცნობს.

ეზეკიელ წინასწარმეტყველის ხილვაშიც წარმოდგენილია სვეტი – „და ვიხილე: და, აჰა, მსგავსება კაცისად წელითგან მისით და ვიდრე შთამართ – ცეცხლი, და წელთაგან მისით ზეშთა ზედანი მისნი, ვითარცა ხილვაჲ ნიავისად და ვითარცა სახე ილუკტრიოდსად, და განირთხა მსგავსებაჲ ჴელისა კაცობრივისა და აღმიღო მე თხემითა თავისა ჩემისადათ და აღმიღო მე სულმან საშუალ ქუეყანისა და საშუალ ცისა და მომიყვანა მე იერუსალჴმად ხილვისა მის ღმრთისა, წინა ბჴეთა ზედა შინაგანისა ბჴისა. მხედველისათა ჩრდილოდ მიმართ, სადა იყო **სუეტი ხატისა შურისა მომგებელისა**“ [ეზეკ. 8: 3]. მოხმობილი ციტატიდან ჩანს, რომ წინასწარმეტყველის ხილვაში ღვთის ხატის სვეტი შურის აღმძვრელია და ისრაელის დიდების ცხადყოფაა.

საყურადღებოა იოანეს „გამოცხადებაში“ „ცეცხლის სვეტის“ განსახოვნების წარმომაჩენელი ერთი სიტყვა – „და ვიხილე ანგელოზი ძლიერი, გარდამომავალი, და ემოსა ღრუბელი; და ირისა, რომელ არს ბერძლებ მშჴა ცისა, იგი იყო თავსა ზედა მისსა; და ჰირი მისი, ვითარცა მზა და ფერანი მისნი, ვითარცა სუეტნი ცეცხლისანი“ [გამოცხ. 10: 1], რომელსაც ანდრია კაბადოკიელი ამგვარად განმარტავს – „...ცეცხლისა ფერანი საშინელებისა და ცოდვილთა ტანჯვისა სახა არს, რომელნიცა აშელსა ზედა არიან, ანუ თუ ჴალაკთა ჴღასათა. ამისთასცა ერთი ფერანი ზრუასა ზედა დადვა და ერთი – ქუეყანასა ზედა, რაათა უმჯულონი ტანჯნეს“ [ანდრია კესარი-კაპადუკიელი, 1961: 254]. განმარტებიდან როგორც ჩანს, „ცეცხლის სვეტი“, უშუალოდ, „ცოდვილთა ტანჯვის სახედ“ გაიზრება. აქვე უნდა აღინიშნოს, რომ „ცეცხლის სვეტის“ ამგვარი გააზრება „წმ. ნინოს ცხოვრების“ რედაქციებში არ გვხვდება.

„ბიბლიური სახისმეტყველებისათვის მნიშვნელოვანია სვეტის საკრალური ფუნქცია, ხოლო სვეტის „ცეცხლოვანება“ სწორედ ღვთის ნების გამოვლინებად არის აღქმული. უმთავრესი აქ... სვეტის უნივერსალურ დანიშნულებამია: მან უნდა ზეაიტაცოს, „ზეგარდმო მზერას“ წარუდგინოს საკრალური და პატივდებული, ხოლო პროფანული... მიწაზე დატოვოს...“ [აბზიანიძე... 2012: 49].

ყოველივე ზემოგანხილულის საფუძველზე შეიძლება ითქვას, რომ ბიბლიის წიგნებში („გამოსლვათა“, „ეზეკიელ წინასწარმეტყველი“, „გამოცხადება“) მოხმობილი „ღრუბლის სვეტი“ და „ცეცხლის სვეტი“, იგივე „ნათლის სვეტი“, თეოფანიის სახე-ხატია, ღვთის მყოფობის დამამოწმებელი ნიშან-სვეტი, რომელიც იაკობის სახლის წინამძღოლი, მხსნელი, მწყალობელი და მფარველი ზღუდეა; ამავდროულად, გულბოროტი ეგვიპტელებისთვის უფლის მრისხანების მაჩვენებელი. როგორც ირკვევა, ისრაელთა კეთილისმყოფელი ღრუბლისა და ცეცხლის სვეტნი შესაძლოა, შურისგების სვეტად იქცეს, როდესაც რჩეული ერი ღვთის აღთქმას არღვევს. ამგვარი გააზრებები ეძებნება ზემოაღნიშნულ ბიბლიურ პარადიგმას, რომელიც შემდგომი ეპოქების შემოქმედთა ნააზრევში ახალი სახექმნალობების დასაბამი გახდა.

A ქართული აგიოგრაფიული თხზულებების შესწავლის შედეგად ირკვევა, რომ „ნათლის სვეტი“ უფლისჩენაა, ჭეშმარიტების ნათლად გამობრწყინებული უფლის სიტყვაა, „წამებათა“ და „ცხოვრებათა“ პერსონაჟების სულიერი სრულყოფილების, მათი ღვაწლის საქვეყნოდ დამამოწმებელი.¹ სიმბოლოურად, იგი „იაკობის კიბეა“ მოწამის ცადადმყვანებელი. „ნათლის სვეტი“ მეუდაბნოე მამათა სამოღვაწეო ასპარეზის განმსაზღვრელი და მათი გზის წინამძღვარია, მსგავსად იმ ღრუბლის სვეტისა, რომელიც ეგვიპტიდან გამოსულ ებრაელებს უდაბნოში აღთქმული ქვეყნისაკენ უძღოდა. წმ. მამები, გიორგი მერჩუელეს თქმით, არიან „სუეტნი შურყველნი, ვითარცა განმტკიცებულნი დაუცემლად სუეტნი ცათანი“ [გიორგი მერჩულე, 1963: 264].

აგიოგრაფთა მიერ გამოიკვეთება სვეტის არსი, კონკრეტულად, „სვეტად“ წოდების საფუძველი – „ღრუბლის სვეტი“, „ცეცხლის სვეტი“, „ნათლის სვეტი“, „ცხოველმყოფელი სვეტი“, „ჭეშმარიტების სვეტი“, „მოთმინების სვეტი“ და სხვ. მათგან პირველი ოთხი ღვთისჩენის ნიშან-სვეტია, ხოლო „ჭეშმარიტების სვეტი“ და „მოთმინების სვეტი“ სრულყოფილების გზაზე შემდგარი პიროვნების „ნათლის სვეტთან“ მიახლების მიმანიშნებელი.

„ნათლის-სვეტის“ პარადიგმისა შესასწავლად მნიშვნელოვანია ნიკოლოზ გულაბერისძის თხზულებანი. ნაშრომში – „საკითხავი სუეტისა ცხოველისა, კუართისა საუფლომსა და კათოლიკე ეკლესიისა“ – კათალიკოსი იმთავითვე განმარტავს აღნიშნული „სამსახოვნების“ ქების მიზანს: „...სამარადისოდ ნათელმყოფელად ყოველთა ნათელთა უზეშთაესსა მას ნათელსა კუართსა ზედა მქსნელისა მაცხოვარისა ჩუენისა იესუ ქრისტესსა...“ [გულაბერისძე, 2008: 5].

„წმ. ნინოს ცხოვრების“ რედაქციათაგან განსხვავებით, ნიკოლოზ გულაბერისძე „საკითხავში“ მოგვითხრობს, რომ ეკლესიის ასაგებად ნაძვები მოკვეთეს და „შეშაღეს შვდნი სუეტნი ეკლესიისანი. ხოლო ექუსნი იგი უკუე სუეტნი აღმართნეს, სადაღა ინება ადგილმან თვს-თვსად, ხოლო უდიდესი იგი სუეტი, რომელი იყო უფრომს მათ სხუათასა, საშუალ ეკლესიისა აღსამართებლად განაწესეს“ [გულაბერისძე, 2008: 28]. ტაძრისათვის შვიდი სვეტის შემზადების ცნობა ლეონტი მროველის „წმ. ნინოს ცხოვრების“ რედაქციიდან მომდინარეა [ლეონტი მროველი, 1955: 112]. რ. სირაძის აზრით, „სვეტიცხოვლის ტაძრის მშენებლობა დაუწყიათ სოლომონის „იგავებში“ მოცემული აზრის კვალობაზე: „სიბრძნემან იშენა თავისა თვისისა სახლი და ქუეშე შეუდგნა მას შვიდნი სუეტნი“ (იგავნი, 9, 1...) [სირაძე, 1992: 116].

ზემოაღნიშნულთან ერთად, ვფიქრობთ, გასათვალისწინებელია რიცხვთა სიმბოლიკა, კერძოდ, რიცხვი შვიდისა, რომელიც საკრალურია როგორც წარმართული აზროვნებისათვის,² ასევე – ქრისტიანული სამყაროსათვის. ჩვენთვის საყურადღებო 7-ის ბიბლიური სიმბოლიკა, უპირველეს ყოვლისა, კოსმოგონიას უკავშირდება. „შესაქმის“ მიხედვით, მეშვიდე დღე განასრულებს ღვთის მიერ წინარე ექვს დღეში ქმნილს. მეშვიდე დღე უფლის დღეა. ბიბლიური შეხედულებით, დემრთისთვის ათასი დღე ერთი დღეა. ქრისტიანთა შორის გაჩნდა რწმენა, რომ მერვე დღე (7000 წლის გასვლის შემდგომ) ესქატოლოგიური ჟამია. ამდენად, რიცხვი შვიდი განმასრულებელია მისი წინმსწრები რიცხვთა ნაკრებისა. ამავედროულად იგი განახლების მომასწავებელია. აღნიშნულთან დაკავშირებით

ნ. სულავა წერს: „...მეშვიდე დღე განსხვავებულია, დაპირისპირებულია, რადგან მეშვიდე დღეს თვისებრივად განსხვავებულ ქმედებას აქვს ადგილი. ოღონდ სრულყოფილება ვერ მიიღწევა ერთ-ერთის უგულებელყოფით. სისრულისათვის ერთიანობაა აუცილებელი“ [სულავა, 2000: 224].

შვიდის აღნიშნული სიმბოლიკა ქართულ აგიოგრაფიულ თხზულებებში თვალნათლივია წარმოჩენილი. გავიხსენოთ „შუშანიკის წამება“, რომელშიც დედოფლის ექვსწლიან ტანჯვას მეშვიდე წელს „ქრისტეს სძლის“ აღსასრული მოჰყვება. საყურადღებოა იოანე საბანისძის მიერ ყოფითი დროის „მეშვიდე დარად“ გააზრება, ვითარცა არაბთა ძალმომრეობისგან „ზარგანხილ“ ქართველთათვის შესენება-გაფრთხილება ესქატოლოგიური, მერვე ჟამის მოახლოვებისა (იხ. კ. კველიძე, რ. სირაძე). მნიშვნელოვანია, რომ მირიან მეფისა და ქართლის მოქცევა წმ. ნინოს მოღვაწეობის მეშვიდე წელს აღესრულება.

ყოველივე ზემოთქული საფუძველს გვაძლევს რიცხვთა სიმბოლიკის კვალობაზე გავიაზროთ ტაძრის ასაგებად 7 სვეტის შემზადება, რომელთაგან მეშვიდე, „უდიდესი“ და „საკვირველ ხილვითა“, ღვთაებრივი ძალით აღმართული ნათლის სვეტი, დედაბოძია, შემაერთებელი და დამაგვირგვინებელი დანარჩენი ექვსისა;

მისი აღმართება-ჩამოსვეტება კი_საწინდარი სვეტიცხოვლის ტაძრის მშენებლობისა და შემდგომში ქართველთა ეკლესიური ცხოვრებისა.

ნნიკოლოზ გულაბერისძე „საკითხავსა“ და „საგალობელში“ ღვთივადმართულ სვეტს სხვადასხვაგვარი ეპითეტებით ამკობს _ „ცხოველი სვეტი“, „სუეტი იგი ნათლისაჲ“, „სუეტი ესე წმიდაჲ, განმანათლებელი და ნათელმყოფელი“, „პირველითგან შესწავებული, სასწაულებითა და ნიშმრავლობითა ფერად-ფერადითა განმშუენებული“, „გოდოლი, შემცუელი ნათლისა თვალშუდგამისა“, „სვეტი ნათლისა ეთერცისკროვნებით განმანათლებელი“, „სვეტი ღვთივბრწყინვალე“, „სუეტი, ეკლესიის სამკაული და ჩვენდა სასო“, „მზის უბრწყინვალესი და ეთერისა ხილვასა უადრესი, ცისკრისა და ელვის ნათელთა უჩინო მქმნელი, კაცობრივითა ჰელთაგან შუხებელი და განუცდელი“, „ებგური და მცველი ჩუენი“, „სასოჲ და ზღუდჳ ქართველთა ნათესავისაჲ“, „ბრწყინვალეჲ გამოუთქმელი“, „ნათელსა მზისასა უფერულმყოფელი და სხივთა მისთა უოვლად უჩინომყოფელი“, „ყოვლადწმინდა“, „მზედაუვალნი“, „სანატრელი“, „სადმრთო“, „თანამზრახველი და მესაიდუმლე მოსესი“, „წინამბრძოლი უძლეველი“ და ა.შ.

რ. სირაძე „სვეტი-ცხოვლის“ სახელდებასთან დაკავშირებით აღნიშნავს _ „ცხოველის მყოფელი“ საღვთო სახელია... „სვეტი ცხოველიც“ იქცევა საღვთო სახელად. ამ სვეტის „ცხოველობა“ გამოხატულია იმით, რომ იგი ღვთაებრივი ნათლითაა აღსავსე. „ცხოველი“ ნიშნავს ცოცხალს და გულისხმობს საღვთო სიცოცხლეს. საბა განმარტავს: „ცხოელ არს უფალი და ცხოელ არს სული შენი (IV მეფ. 4. 30)“. საღვთო სიცოცხლე მარადიულია. ქრისტე „არა არს ღმერთი მკუდართაო, არამედ ღმერთი ცხოველთაო“ (მრ. 12, 27). ქრისტიანობა საუკუნო ცხოვრებაა (მთ. 19, 20). ქრისტე სიტყვაა სიცოცხლისა (I ი. 1, 1), სულია სიცოცხლისა (I კორ. 15, 45), „ნათელია ცხოვრებისა“ (ი. 8, 12), სიკვდილისა სიცოცხლითა დამთრგუნველია (შდრ. II კორ. 5, 4). ყოველივე შეიძლება შევაჯამოთ იოანეს სახარების სიტყვებით: „ცხოვრებაჲ იგი იყო ნათელ კაცთა“ (ი. 1, 4)... სვეტიცხოვლის ტაძარი სიმბოლოა სვეტი-ცხოვლისა“ [სირაძე, 1992: 115-116].

„საკითხავში“ წარმოჩენილია ძველი პლასტების, სახე-სიმბოლოების, დესაკრალიზება და მათი მოდიფიცირება, კერძოდ, წარმართული ხის კულტის ბიბლიური „ცეცხლის სვეტად“ გარდასახვა _ ნათლით შემკობილი ჭაბუკის მიერ აღმართული „სუეტი იგი ცეხლის სახედ შეცვალებულ იყო...“ [გულაბერისძე, 2008: 29] და კიდევ _ „...სუეტი ცეცხლისა სახედ შეცვალებული და გაბრწყინებული“, „...ნათლისა სუეტი ცეცხლისსახედ ცამდე აღწევნული...“ [გულაბერისძე, 2008: 52]. თავის ხარისხზე დაფუძნებული სვეტის სახეცვლის აგრერიგად გამოკვეთა (“წმ. ნინოს ცხოვრების” მიხედვით, „სუეტი იგი ცეცხლის სახედ“ იხილვება), ჩვენება იმისა, რომ სვეტი-ცხოვლის წინასახე ბიბლიური „ცეცხლის სვეტია“ _ „წინასწარმეტყუელთა და მამათაგან სუეტად ნათლად ცეცხლისად, წმიდად და უბიწოდ მოსწავებული“ [გულაბერისძე, 2008: 68]; რომ „სვეტი-ცხოველი“, მსგავსად უდაბნოში მავალ ებრაელთა თანმსდევ ცეცხლისა და ღრუბლის სვეტებისა, მორწმუნე ქართველთა მფარველი, წინამძღოლი და ახალი გზის დამსახავია, რამეთუ იქ უფალი მყოფობს, იხილვება და ნათლის ნიშან-სვეტიდან იხილვება _ „...მივისწრაფოთ ნათლისა მის საკრველისა ხილვად, უკუეთუ ნანდვლვე ესე ნათელი მისი ნათლისაჲ გამოჩენილ არს, რომელსა წინაჲსწარმეტყუელნი ჩუენნი მოასწავებდეს ძესა ღმრთისასა..“ [გულაბერისძე, 2008: 34].

აქვე „საკითხავიდან“ ნიმუშად მოვიხმობთ სვეტი-ცხოველთან დაკავშირებულ ერთ პასაჟს, რომელიც წარმართული სახეების დესაკრალიზების და მათი ქრისტიანულად გადააზრების ერთგვარი ცდაა. ნიკოლოზ გულაბერისძე „ნათლის სვეტს“ ამგვარ ქებას აღუვლენს _ „გიხაროდენ, # სუეტო ნათელო, რომელი ნათელსა კუართსა ნათლისასა სახედ მზისთუალსა ზეით ჩამოუჭრობ, რომელსა შუენი ელვისანი სხივთა მათ ცეცხლისათა...“ [გულაბერისძე, 2008: 59]. ამდენად, ავტორი, „ნათლის სვეტს“ „მზის თვალად“ აღიქვამს, რომელიც ზემოდან მზეებრ „ჩამოუჭვრებს“, ჩამოუნათებს უფლის კვართს და ცეცხლის სხივებით ელვის შუქს ჰფენს. აქ „მზის თვალი“ მითოსური მზის საკუთრებაა, რომელიც დღემდე შემორჩენილია არაერთ გამონათქვამში _ „ცხრათვალა მზე“, „მზე _ ცის თვალი“, ყურძნის მწიფობისას თქმული _ „თვალი (მზისა _ ნ.გ.) ჩასულა მტევანში“, „თვალი მზიური“ (იხ. ვ. ნოზაძე, მ. ჩიქოვანი, ვ. ბარდაველიძე, ი. სურგულაძე, თ. ჩხენკელი, რ. სირაძე და სხვ.). ამდენად, ნიკოლოზ გულაბერისძემ „მზის თვალი“ განტვირთა წარმართულისაგან და იგი ქრისტიანული სიწმინდეების განსახოვნებისათვის მოიხმო.

„სვეტი-ცხოველი“ _ ეს რომ ისრაელთა თანამდევნი იგივე „ცეცხლის სვეტია“, არაერთგზისაა ნაჩვენები ნიკოლოზ გულაბერისძის „საკითხავსა“ და „გალობანში“ _ „გიხაროდენ, i სუეტო ცხოველო და წმიდაო... რაჟამს-იგი ისრაიტელთა ერსა წინა-უძღოლი და უცთომელად ავლინებდი, ვინაჲცა ენება შენ მიერ დამბადებულსა

ყოველთა ნათელთასა და შენ მიერთთა საკრველმოქმედებითა იდიდებოდა ღმერთი უდაბნოსა მას ორმოც წელ დიდისა მოსეს თანადობითა, ღუაწლმრავლობით ებურქმნილო, შესაწევნელად ერისა ისრაიტელთასა, ხოლო მომსთველად უცხოთესლთასა და ამაღეისა!” [გულაბერისძე, 2008: 59; იხ. აგრეთვე _ გვ. 50, 54, 67-68 და სხვ.].

აღნიშნულთან დაკავშირებით საინტერესოა ნიკოლოზ გულაბერისძის შეხედულება, რომელიც სვეტი-ცხოვლის ერთ-ერთ სასწაულშია გაცხადებული, კერძოდ, აქ აღწერილია სოჯი დედოფლის მიერ სვეტი-ცხოვლის შემწეობით აღიღებული არაგვის სასწაულებრივი გადალახვა. ავტორი აღნიშნავს „და მსგავსად ჰირველისა მის ჩვეულებისა საკრველებისა, მასვე ღმერთსა აქაც უკუე ნებიეს სუეტისა ცხოველისა მიერ, რომელ-იგი ძუელ-ოდესმე ისრაიტელთა ზედა საკრველთმოქმედება, რაჟამ-იგი მისვე სუეტისა წინამძღურობითა მოგზაურობდეს, რაჟამს-იგი ზღუასა მეწამულსა განვიდეს და წყალნი იგი ექმნეს ზღუდე მარჯუენით და ზღუდე მარცხენით, მაშინცა უკუე ესევე სუეტი ნათლისაა წინა-უძოდოდა, რომლისა მიზეზითა და სასოებითა აწ ამან დედოფალმან, რაჟამს შთაჯდა ამას მდინარესა, საკრველად განცოფებულსა, იგივე უკუე შეკდემულება თავს-იღვა და აქაცა ექმნა ზღუდე მარჯუენით და ზღუდე მარცხენით, ვიდრემდის იგი თავადი და ყოველი ერი მისი წიაღ-ჯდეს ამიერ დაუღლოველად და ყოველი იგი ერნი და რომელთა ესმა და რომელთა იხილეს, დედოფლისა თანა ყოველნივე აღიღებდეს ღმერთსა და სუეტსა ცხოველსა” [გულაბერისძე, 2008: 50-51].

ნიკოლოზ გულაბერისძე წარმოაჩენს რა „სვეტი-ცხოვლისა“ და „ცეცხლის სვეტის“ იგივეობას, მეწამული ზღვისა და არაგვის სასწაულებს ერთმანეთს უდარებს და ერთობ მოულოდნელი დასკვნა გამოაქვს „ესე უკუე სასწაულნი... ისრაიტელთა მათ ზედა ქმნულისა სასწაულისა არარადით უკუე უმცირეს არს, არამედ კნინდა და უმეტესცა ეგონე, ვინაძოგან იგი მდოვრად მდგომი ზღუა იყო, ხოლო ესე მქანარედ მავალი, ვითარცა მგელი განძნებული, ხოლო ორივე ღმრთისამიერი იყო” [გულაბერისძე, 2008: 31].

როგორც ვხედავთ, ავტორი ქართლში მომხდარ სასწაულს ებრაელთა სასწაულზე აღმატებულად მიიჩნევს და ამის მიზეზსაც კი ასახელებს _ სასწაული ღვთისმირია და მას ზეციური ძალა აღასრულებს. მდორე მეწამული ზღვისა და გამძვინვარებული არაგვის განპობის შედარება, ვფიქრობთ, მართებული არ უნდა იყოს. ტექსტიდან ჩანს, რომ ამას ავტორი თავადაც აცნობიერებს და ამიტომ ერთგან ურთავს _ „ვგონე”. ნიკოლოზ გულაბერისძეს ამგვარი შედარებით და „სვეტი-ცხოვლის“ სასწაულის აღმატებულობის აღნიშვნით სურს მისი ღვთაებრივი დიდებულებისა და ძალმოსილების წარმოჩენა. ამავედროულად, სვეტის „ცეცხლის სვეტად“ „შეცვალება“ იმის მაწყებელიცაა, რომ „ლიბანით დანერგული“ ნაძვისგან შემზადებული სვეტის აქამდე დაფარული ცხოველმყოფელობა ზეგარდმო მადლით გაბრწყინდა და „გამუენდა”, რათა ახლადმოქცეულ ქართლის ერს კიდევ ერთი უფლისმიერი სასწაული ეხილა, კვლავაც დარწმუნებულიყო ქრისტიანული ღმერთის ყოვლისშემძლებლობაში. სიმბოლურად, ეს უფლის ხელდასხმით აღსრულებული „ფერისცვალებაა”: სვეტის წილ _ „ცეცხლის სვეტი („ნათლის სვეტი“), სვეტიცხოვლის ტაძრის აღმენების საწინდარი, მისი დედაბოძი, და უმთავრესი _ უფლის კვართის დაფვლის ადგილას ამოზრდილი, რწმენით ნასაზრდოები და, ამდენად, „მშვენიერებით შემოსილი”. ავტორისათვის სწორედ ამ სამი ნათლის _ სვეტიცხოვლის ტაძრის, ნათლის სვეტის, უფლის კვართის _ ჰარმონიული თანაყოფნა სამების სახოვანებად გააზრების საფუძველს ქმნის. „i სამნო სამნათელნო, მსახეებელნო წმიდისა სამებისანო...” [გულაბერისძე, 2008: 63] და „სამნი ესე _ სამებისა წმიდისა მსახეებელნი _ კათოლიკე ეკლესიაა, კუართი უფლისაა და სუეტი ცხოველი საუნჯესა უკვდავმყოფელსა გზაყოფებენ...” [გულაბერისძე, 2008: 5] _ ამგვარად მიმართავს ნიკოლოზ გულაბერისძე ქართველთა სამ უძვირფასეს საუნჯეს. N

„საკითხავში” ნათლის სვეტი მიწიერების ზეციერებისკენ სწრაფვის და მათი კავშირის ხილულ სასწაულადაა მიჩნეული _ მეფემ „... იხილა ნათელი, რამეთუ ჰკრთებოდა ვითარცა ელვად, ხოლო აღწევნილ იყო ქუე სამოთხით ვიდრე ზეცადმდე...” [გულაბერისძე, 2008: 30]. გავიხსენოთ „აბოს წამებაში” აღწერილი მსგავსი მოვლენა _ აბოს ძვლების ჩაყრის ადგილას „... აღმობრწყინდეს ნათელნი სუეტისა მსგავსად, ვითარცა ელვანი, რომელნი კუალად მყოვარ ქამ დგეს და განათლებულ იყო გარემომას კიდეთა მის მდინარისათა კლდეს იგი და კბოლენი და ჳიდი იგი, ზმტოგან ვიდრე ქუედმდე, რომელსა ეგრევე ყოველი სიმრავლეს ქალაქისაა ჰხედვიდა...” [საბანისძე, 1963: 75] და კიდევ _ „... ქუეყანით ზეცად მიწევნულად, ქუეყანით ვიდრემე აღმოცენებულად, ხოლო ზეცას აღმწუერვალეებულად, რომელი მის შორის მკვდრქმნილსა ღმრთისა სამარადისოდ ჰკიეს და ღმერთი მის მიერ ჩუენ შორის” [გულაბერისძე, 2008: 62].

სვეტი-ცხოვლის ამგვარი გააზრება, როგორც უკვე აღვნიშნეთ, უკავშირდება როგორც წარმართული ხის კულტს, ბიბლიურ თხრობას სამოთხეში დანერგილ ცხოვრების ხის შესახებ, ასევე – მამამთავარ იაკობის ხილვას.

„საკითხავში“ „ნათლის სვეტის“ პარადიგმა ახალი აღთქმის სხვა სასწაულსაც უკავშირდება, კერძოდ, უფლის ფერისცვალებასა და იორდანეში ნათლობას – „*გიხაროდენ, # სუეტო ნათელო, რომელი ძისა ღმრთისა დიდებასა ღმრთეებისა საკრველობით მწამებელ ექმენ, რაჟამს თაბორს ჰკრთებოდე, ნათელმფლობელსა მას ზედა იესუ ღმერთ-კაცსა მეორედ მოსლვასა მაუწყებლობდა რად, რამეთუ ჟჳრობამან დიდებისა შენისამან თავნი იგი მოციქულთანი ძესა ზედა ღმრთისასა უცხოსახედ მხილველნი რეცა უსულოქმნით მოუთმენლობდეს ზარგანვდილნი ერთბამად ნათლისაგანცა დიდებისა შენისა და ოხრისაგანცა მოსეს და ელიადასა და კუალად იორდანესცა, რაჟამს წყალთა შინა ცოდვასა კაცთასა დაანთქმიდა...*“ [გულაბერისძე, 2008: 61]. მსგავსი პასაჟი „საგალობელშიც“ იკითხება – „*ესე სუეტი... თაბორს და იორდანეს ძესა ღმრთისასა მსახურ ექმნა*“ [გულაბერისძე, 2008: 68, იხ. აგრეთვე – 74, 76].

მოხმობილი პასაჟებიდან როგორც ჩანს, ნიკოლოზ გულაბერისძე იოანე ნათლისმცემლის მიერ უფლის იორდანეში ნათლობისას მომხდარ სასწაულს (ცის გახსნას და მტრედის სახით სულიწმინდის გადმოსვლას – მათ. 3: 16) „ნათლის სვეტის“ გამოიჩენას უკავშირებს. საფიქრებელია, რომ აქ ავტორი „ნათლის სვეტს“ ღვთისჩენის ნიშან-სვეტად მოიაზრებს და ამიტომაც „ნათლის სვეტს“ ღვთისაგან უფლის ძედ გაცხადების დამამოწმებლად მიიჩნევს [იხ. მათ. 3: 17].

რაც შეეხება თაბორის მთაზე უფლის ფერისცვალებისას „ნათლის სვეტის“ ჩენის აღნიშვნას (რომელიც სახარებათა ტექსტებში არ ვლინდება). ვფიქრობთ, ნიკოლოზ გულაბერისძემ „ნათლის სვეტი“ „ნათლის ღრუბელთან“ გააიგივა.

„ნათლის სვეტი“ „საგალობელში“, ღვთისმშობლისადმი მიძღვნილ ტროპარში, ქრისტეს სიმბოლოდ მოიაზრება – „*#, დედაო და ქალწულო, ნათელო, ნათლის სუეტისა მსახუბელო...*“ [გულაბერისძე 2008: 70]. ნიკოლოზ გულაბერისძე თხზულებებში გამოკვეთს აზრს, რომ სვეტი „ნათელმფლობელი“ ქრისტეს მიერ აღიმართა – „*გიხაროდენ, # სუეტო წმიდაო, ცხოველო და ცხოველმყოფელო, რომელი ნათელმან უსაზღვრომან, ნათელმფლობელმან ძემან ღმრთისამან ნათლად ელვისად და სუეტად ცხოველისად ადგმართა...*“ [გულაბერისძე, 2008: 52]. ავტორი აქვე წარმოაჩენს ნათლის სვეტის აღმართვის მნიშვნელობასა და დანიშნულებას – „*...ნათელმყოფლად გულებსა ქართველთა ერისასა, დაბნელებულსა კერპთა საცთურისაგან. ხოლო ურწმუნოთა ცეცხლებრ უწყალოდ შემჭმელად ღირსად მისაგებლად ლტოლვისათვის წმიდისა ნათლისა შენისა, # სუეტო წმიდაო და ცხოველო!*“ [გულაბერისძე, 2008: 58].

ნათლის სვეტი, როგორც ირკვევა, კერპთაყვანისმცემლობის სიბნელეში მყოფ ქართველთათვის ახალი ცხოვრების მიმნიჭებელია, ამდენადაა იგი ცხოველმყოფელი. აქვე ერთი საინტერესო ნიუანსიც იკვეთება, კერძოდ, „სვეტი-ცხოველი“, ავტორის თქმით, ურწმუნოთათვის უწყალოა, „*ცეცხლებრ შემჭმელი*“ და საზღაურის მიმგებელი. მსგავსი აზრი „საგალობელშიც“ გვხვდება – „*ნათლის სუეტო, ცეცხლისსახეო, შემწუველო უღმრთოთა ერისაო, რაჟამს ტაძარსა შენსა მოვიდეს წარმართნი, განხილვასა ეცადნეს, ხოლო შენ ცეცხლისა მიერ შესწუნენ. რაჟამს-იგი წარმართთა ერნი საუნჯესა მგონებელნი ჯელ-ჰყოფდეს კადნიერად, ცეცხლი გამოჰკრთა და უწყალოდ შეჭამნა უბადრუკნი...*“ [გულაბერისძე, 2008: 70]. ვფიქრობთ, აღნიშნული პასაჟები გამოძახილია „საკითხავში“ ჩართული „სვეტი-ცხოვლის“ ერთ-ერთი სასწაულისა, რომელშიც მოთხრობილია თურქთა შემოსევისას სვეტიცხოველში „მვეცებრივითა მძვინვარებითა“ შევარდნილ ბარბაროზთა შესახებ. ტექსტიდან ვიგებთ, რომ სულთანმა „გამოიძია“ კონქში მოთავსებული სიწმინდის რაობა და შეიტყო რა „სვეტი-ცხოვლის“ ღვთაებრივი არსისა და ძალმოსილების შესახებ, ირწმუნა „დიდებულებანი ღმრთისანი“ და იმ ადგილს განუმორა. სულთნის წასვლის შემდგომ ტაძარში მისი მეუღლე, შაჰრი-ხათუნი მივიდა, ყურად არ იღო რჩევა-გაფრთხილება, ფიქრობდა, რომ იქ დიდძალი საუნჯე ინახებოდა და „განსახილველად“ კიბე მიადგმევინა. სწორედ ამ დროს „*მყის გარდამოკრთა ცეცხლი სუეტისა მისგან რისხვსა ღმრთისად, და რაოდენნიცა ჰოვნა ძირსა მის სუეტისასა ბარბაროზნი, უწყალოდ შეჭამნა უწყალონი იგი და სრულიად განხრწნნა...*“ [გულაბერისძე, 2008: 52], ცოცხლად დარჩენილნი შეშინდნენ და იქაურობას გამოდნენ. სულთნის ცოლი კი უფრო მეტად გამძვინვარდა – ბრძანა ტაძრის დაწვა. სწორედ ამ პასაჟში ჩნდება ღვთის „მურისგებითი“ ბუნება – „*ხოლო იხილეთ აქაცა ნაცვალისგებად მურისგებითი ღმრთისა საბაოთისად, თუ ვითარ არა ყოვნა სასჯელმან მურისმადიებელსა მას ზედა ღმრთისა საკრველებათასა, რამეთუ მყის მასვე ჟამსა ეწია რისხვად ღმრთისად*

ზეგარდამო და შემკადრებელსა მას სუეტისა ცხოველისა და ნათლისასა ცეცხლი შეეღვა ნაწლევთა, ყოველთავე შინაგანთა მისთა უწყალოდ შემჭამელი, და მყის ლტოლვილმან სპარსეთადვე მგზავრ მსრბოლობასა შინა, მუჰედრა სული თვისი...” [გულაბერისძე, 2008: 52].

მოსმობილ პასაჟებში ჩვენი ყურადღება მიიქცია „ცეცხლის სვეტმა“, რომელიც, როგორც აღინიშნა, ბიბლიის მიხედვით, ეგვიპტელთათვის განადგურების მომასწავებელია. აქედან გამომდინარე, ნიკოლოზ გულაბერისძის მიერ ნათლის სვეტის შურისმაძიებელი ბუნების აღნიშვნა სრულიად გასაგები ხდება. შემოადინიშნული აზრის („სვეტი-ცხოვლის“ ორგვარი ბუნების) დამადასტურებელია კათალიკოსის „სვეტი-ცხოვლისადმი“ აღვლენილი შესხმაც „„გიხაროდენ, სუეტო ცხოველო,... მხიარულმყოფელსა სულთასა ზეცისა სივრცესა ელვებრ აღმაფრინებელსა ფრთითა ცეცხლისფერითა, რომელ შესწუავს სულთა ბოროტთა და წინააღმდეგობთა...” [გულაბერისძე 2008: 65].

„საგალობელში“, როგორც უკვე აღვნიშნეთ, „ნათლის სვეტი“ ქრისტეს სიმბოლოა; მაცხოვარი კი ამბობს – „ნუ ჰგონებთ, ვითარმედ მოვედ მე მიფენად მშვიდობისა ქუეყანასა ზედა; არა მოვედ მე მიფენად მშვიდობისა, არამედ მახვილისა“ [მათ. 10: 34]. „ქრისტიანობა მიტევების რელიგიაა. აქ მთავარია მაღლი, მაღლი მიტევებისა, ოღონდ არა სატანისადმი. სატანური უნდა დაითრგუნოს მახვილით, სულიერი მახვილითაც და საომართაც. ასეთია მახვილი თვით მაცხოვარისა“ [სირაძე, 2000: 205].

ნიკოლოზ გულაბერისძე თავის თხზულებებში „სვეტი-ცხოველს“ უკავშირებს მამა ღმერთს, რომელიც „ბერისა კაცის“, „მოხუცებულისა ბერიკაცის“ სახედ წარმოდგება და რომელიც, ავტორის თქმით, უმეტესწილად „ძუელი ღღის“ სახედ იხილვება – „აჰა ესერა განვაცხადოთ, რამეთუ თვთ ვითარ სახელ-იღების ყოველთაგან სუეტად ნათლისად და ცხოველისად, ესრეთ მრავალთაგან ხილულ არს და უფრომსდა დასაბამითგანვე იხილვების, რაჟამს-იგი ძუელ-ოღესმე ისრაიტელთა წინა-უძღოდა, არამედ აწ ეჟა უფრომსად სახედ ბერისა კაცისად იხილვების ყოველთაგან...“ [გულაბერისძე, 2008: 54]. ნიკოლოზ გულაბერისძე, როგორც თავად ამბობს, საკუთარი ცდილობს, განმარტოს ამგვარი სახის „წარმოჩენისა“ და „გამოსახვის“ შინა-არსი. უპირველეს ყოვლისა, იგი მსმენელსა თუ მკითხველს ერთარსება სამების ღოგმატის არსს შეახსენებს და დასძენს, რომ „ეს სუეტი წმიდაა ნათლისაა ერთ ნათელად შეერთებულისა სამებისა წმიდისა სახედ, ერთ ნათელად გამომსახველად შემოკრბების უჭუელად...“ [გულაბერისძე, 2008: 55]. კათალიკოსი აქვე იმონებს დანიელ წინასწარმეტყველის თქმულს „ძუელი ღღეთაჲს“, „ერთნათელის“, მეორედ მოსვლის შესახებ. მისი შეხედულებით, როგორც მეორედ მოსვლისას სამების „ერთნათელი“, „ძუელი ღღეთაჲ“, მოვა, ასევე სამების „ერთნათელი“, „ნათლის სვეტი“, მისი ხილვის ღირსთ „ძუელი ღღეთაჲს“ მსგავსად ეჩვენებათ. იგი იმონებს ქუმმარიტ გადმოცემებს სვეტი-ცხოვლის სასწაულთან დაკავშირებით: „...მრავალგზის ხილვასა სახედ ძუელისა ღღეთაჲსა რომელსამე ჟამსა თავსა სუეტისასა მჯდომარედ და ოღესმე ეკლესიასა შინა მყოფად და სხუასა ჟამსა _ სუეტსა წინამჯდომარედ, გარნად უფრომს ხოლო _ სუეტისა თავსა ზედა მჯდომარედ“ [გულაბერისძე, 2008: 55].

აღნიშნულთან დაკავშირებით რ. სირაძე წერს: „მოხუცებული კაცი“ სვეტი-ცხოვლის სახეში მისტიკური ხილვაა, რომლის წარმოსახვაც მასთან სულიერ ზიარებას გულისხმობს, ანუ გულისხმობს სასწაულის მომლოდინე ლიტურგიულ ცნობიერებას. ეს სასწაული „გასაგნებელია“ ანუ ხატქმნილია სვეტიცხოვლის სიწმინდეთა შორის“ [სირაძე, 1992: 111].

ლ. გრიგოლაშვილი ცდილობს, გაარკვიოს ნ. გულაბერისძის მიერ „ნათლის სვეტის“ „ბერი კაცის“ სახედ ხილვის მნიშვნელობა. იგი გამოყოფს „ბერი კაცის“ სახის მიმართებას „ძუელ ღღეთაჲსთან“. მეცნიერი მოიხმობს დანიელის წინასწარმეტყველებას, რომელშიც ღვთაება, „ძუელი ღღეთაჲ“, წარმოდგენილია ბერი კაცის სახით. „ნიკოლოზ გულაბერისძის მოსაზრებით, „ძუელი ღღეთაჲ“ და „ბერი კაცი“ ღვთაების ერთსა და იმავე ასპექტზე მიუთითებენ და ამიტომ იხილვების „სუეტი ნათელი, ვითარცა ძუელი ღღეთა“ [გრიგოლაშვილი, 2005: 94].

ლ. წერეთელი გულაბერისძის „საკითხავში“ დავით აღმაშენებლის „ძუელი ღღეთას“ ხილვის შესახებ აღნიშნავს, რომ მეფეს „...ბერიკაცის სახით ეცხადება (სვეტიცხოვლის გამომხატველი) თავად წმინდა სამება“ [წერეთელი, 2005: 144] და რომ იგი დავითის სულიერი ფერისცვალების, „ახლად შობის“ მომასწავებელია.

ყოველივე ზემოაღნიშნული ცხადყოფს, რომ ნიკოლოზ გულაბერისძე არა მარტო „ნათლის სვეტს“, უფლისკვართსა და სვეტიცხოვლის ტაძარს სამების სამსახოვნებად გაიაზრებს, თავად „სვეტი-ცხოველს“ სამების ჰიპოსტაზებს უკავშირებს.

საკითხთან დაკავშირებით რ. სირაძე დასძენს, რომ „...სვეტი-ცხოველი, ანუ ნათელი სვეტი, განასახოვნებს ერთარსებას სამებისას – მამისა, ძისა და სული წმიდისა. ამასთანავე, სვეტი-ცხოველი განასახოვნებს მამა ღმერთს. მისი სიმბოლო „მოხუცის“ სახით უნდა წარმოვიდგინოთ. „მოხუცი კაცი“ თავისთავადაც წარმოისახება და სვეტი-ცხოველშიც განსახოვნდება. მასშივე განსახოვნდება „ძველი ღლე“, რომელიც „სულითა ხოლო საცნაურ არს“. ძველი ღლე განახლდება „ახალ ღლეში“, ანუ ქრისტეში (იგივე „მზიან ღამეში“) [სირაძე, 1992: 113].

„საკითხავსა“ და „საგალობელში“ „სვეტი-ცხოველად“ იწოდება ღვთისმშობელიც. ავტორის თქმით, წინასწარმეტყველთა და წმ. მამათა მიერ „ცეცხლის ნათლად“ სახელიდება, რომელიც ქვეყნად აღმოცენებული ზეცად „აღმწერვალდა“, ღმერთთან სამარადისოდ იხილვება და „ღმერთი მის მიერ ჩუენ შორის“ [გულაბერისძე, 2008: 62].

აღნიშნულის საფუძველზე ნიკოლოზ გულაბერისძე ქალწულ მარიამს სვეტის განმასახოვნებლად მიიჩნევს „*ჭ, დედაო და ქალწულო, ნათლო ნათლისა სუეტსა მსახებულო, ხოლო სუეტად სახელდებულო...*“ [გულაბერისძე, 2008: 70; იხ. აგრეთვე _ 74,78]. ავტორი „სვეტი-ცხოვლის“ ღვთისმშობელთან მიმსგავსებულობის კიდევ ერთ ნიშანს გამოჰყოფს – „*სუეტო ჩუენო და ნათლო, დედაო ძისა ღმრთისაო, რომელმან ძუძუთა თვსთა მიერ იესუ ღმერთი აგემუ, ეგრესახედვე სუეტისა მიერ მიჰრონსა ჩუენცა გუაგემუ შუნ*“ [გულაბერისძე, 2008: 77; იხ. აგრეთვე _ 65, 68, 70, 74]. ამდენად, მირონმდინარე „სვეტი-ცხოველი“ (თავისი „სიტკობების წყაროს“ მადლით) ქართველთა სულის მაცხოვრებლის, დედა-აღმზრდელის შინა-არსით ვლინდება.

N „საგალობელში“ „სვეტი-ცხოვლის“ პარადიგმის კიდევ ერთი საყურადღებო გააზრება წარმოჩინდება, კერძოდ, ნიკოლოზ გულაბერისძე თორმეტ მოციქულზე სულიწმინდის მოფენისას ცეცხლისდარად ენათა განყოფას „ცეცხლის სვეტის“ გამოვლენად სახავს – „*გიხაროდენ, სიონს მოციქულთა ზედა ათორმეტ ნაწილად ენად ცეცხლისად გარდამოვლებულო!*“ [გულაბერისძე, 2008: 76].

ამ თვალთახედვით თუ გავიაზრებთ ნიკოლოზ გულაბერიძის ნათქვამს, სვეტის აღმართვისას მისი ცეცხლის სახედ ცვალება და ნათლით გაცისკროვნება, სიმბოლურად, წმ. ნინოზე (მსგავსად 12 მოციქულისა) სულიწმინდის მოფენის მაჩვენებელია, რომელიც მოციქულთა სწორს ქართულ ენამეტყველებას და მის „მოქცევას“ განუჩინებს.

რ. სირაძის აზრით, „სვეტი-ცხოველსა და სვეტიცხოვლის ტაძარს სიმბოლურად უკავშირდება: მამა ღმერთი, წმინდა სამება, კვართი უფლისა და აღდგომის იდეა, ღვთისმშობელი, 12 მოციქული და წმ. ნინო... რომელიც იყო ჩვენი „ახალი მოციქული“ [სირაძე 1992: 119]. N

ნიკოლოზ გულაბერისძის მიერ „საკითხავსა“ და „საგალობელში“ გამოთქმული თეოლოგიურ-ფილოსოფიური ხასიათის სჯანი, ეროვნულ-სარწმუნოებრივი იდეალების წარმომაჩენელი და განმსაზღვრელი ფაქტორების გამოკვეთის ცდანი „სვეტი-ცხოვლის“ პარადიგმას მრავალსაფეხურიანი სიმბოლური დატვირთვით წარმოაჩენენ, კერძოდ –

1. „სვეტი-ცხოვლის“ ნათელი სამების სახე-ხატი, სახე-სიმბოლოა – „*ესე სუეტი წმიდაჲ ერთ ნათლად შუერთებული სამებისა წმიდისა სახედ...*“ [გულაბერისძე, 2008: 55];
2. „სვეტი-ცხოველი“ მამა ღმერთის („*ვითარცა ძველი ღლეთაჲს*“ – გულაბერისძე, 2008: 55), „*ბერისა კაცის*“, „*მოხუცებულის*“, სახე-ხატი, რაც „საკითხავში“ არაერთგზისაა აღნიშნული – „*... აწ აქა უფროჲსად სახედ ბერისა კაცისად იხილვების ყოველთაგან*“ [გულაბერისძე, 2008: 54]; *ესე სვეტი ნათლისაჲ, ვითარცა ძუელი ღლეთაჲ იხილვების...*“ [გულაბერისძე, 2008: 55], „*...ამას სუეტსა ზედა ზე თავსა მჯდომარე იყო მოხუცებული ვინმე სახედ ძუელისა ღლეთაჲს...*“ [გულაბერისძე, 2008: 55], „*...ეჩუენა სუეტი ცხოველი სახედ მოხუცებულისა ბერიკაცისა მიუთხრობელითა რადთმე ბრწყინვალეებითა...*“ [გულაბერისძე, 2008: 56];

3. „სვეტი-ცხოველი“ ქრისტეს ნათელი სვეტია „*სუეტი ნათლისა ჩამოდგა ვიდრე ჩუენდადმე... და წურისა მის სუეტისასა მჯდომარე იყო იგი, რომელი მამათა ჩუენტა ჯუარს-აცუეს*“ [გულაბერისძე, 2008: 35]; „*ჭ, დედაო და ქალწულო, ნათულო, ნათლისა სუეტისა მსახეებულო*“ [გულაბერისძე, 2008: 70]. „სვეტი-ცხოველი“ თვალმუდგამი, მზეზე აღმატებული ნათელია, სამყაროსა და მზეზე უმძლესია „*შენ ხარ ნათელი და ბრწყინვალეადა გამოუთქმელი, რომელი სამყაროსა და მზესა მძლე ექმნები, სუეტო ცხოველისმყოფელო...*“ [გულაბერისძე, 2008: 70; იხ. აგრეთვე _ 65, 72];
4. „სვეტი-ცხოველი“ ღვთისმშობლის განმასახოვნებელია „*ჭ, დედაო და ქალწულო, ნათულო, ნათლისა სუეტისა მსახეებულო, ხოლო სუეტად სახელდებულო, რომელსაცა შიშით გადიდებენ ქერობინნი და ჩუენცა მათ თანა ძრწოლით გიგალობთ და გაქებთ დაუცხრომლად*“ [გულაბერისძე, 2008: 70]; „*გიხაროდენ, უფროადასად ყოვლანძიდისა ღმრთისმშობელისა მსახეებულო*“ [გულაბერისძე, 2008: 76; იხ. აგრეთვე _ 62, 74, 78];
5. „სვეტი-ცხოველი“ ქართველთა უმაღლეს ნათელთან ზიარების სიმბოლოა „*სუეტი ესე წმიდაა განმანათლებელი და ნეთელმყოფელი სულთა და გონებათა ჩუენტაა*“ [გულაბერისძე, 2008: 39]. „განმანათლებელი“ მიემართება გონებას, „ნათელყოფა“ – სულს. „სვეტი-ცხოველი“ მიმახლებელი, მის წმინდა მირონს მზიარებელი მორწმუნე ღვთაებრიობამდე მალდებდა; „სვეტი-ცხოველი“ მისკენ მოსწრაფეთა განმადმრთობელია: „*გიხაროდენ, სუეტო ცხოველო,... ღმერთ-ჰყოფ ყოველთა შენდა მომართ მოღვთოვითა*“ [გულაბერისძე, 2008: 65];
6. „სვეტი-ცხოველი“ ურწმუნოების, კერპთა ბოროტების აღმოფხვრის, მტერთა დათრგუნვის და, იმავდროულად, ახალი სარწმუნოების წარმოჩენის, რწმენის განახლების სიმბოლოა „*გიხაროდენ, კერპთა ვიდრემე სიბოროტისა წარმწყმედულო, ხოლო ჭქმარიტისა სარწმუნოებისა აღმომაჩინებულო!*“ [გულაბერისძე, 2008: 77]; „*გიხაროდენ, მოკლებულისა სარწმუნოებისა განახლებაო!*“ [გულაბერისძე, 2008: 77];
7. „სვეტი-ცხოველი“ მიწისა და ზეცის შემაერთებელია, რომელიც „*იაკობის კიბეს*“ განასახოვნებს „*...სუეტი ნათლისა მთამოდგა ვიდრე ჩუენდადმე, რომლისა თავი მისი მისწუთებოდა ცადმე...*“ [გულაბერისძე, 2008: 35; იხ. აგრეთვე _ 30, 62];
8. „სვეტი-ცხოველი“ ქართველთა იმედი და მცველი ზღუდეა, მარადჟამს სავედრებელი, რომელიც ღვთაებრივ უხილავად მყოფობს ადამიანთა შორის „*i სასწაული საკრველთა სუეტი, სასოა და ზღუდჳ ქართველთა ნათესავისა, რომელი უხილავ ჩუენ შორის მდგომარე არს*“ [გულაბერისძე, 2008: 66]; მეუდაბნოე მამათა და მოწამეთა იმედია [გულაბერისძე, 2008: 76];
9. „სვეტი-ცხოველი“ ქართველთა „*ერად საზეპუროდ*“³ გაცხადების სიმბოლოა „*გიხაროდენ, მომგებულო ერად საზეპუროდ, ნათესავთა წმიდად და სამუფოდ!*“ [გულაბერისძე, 2008: 76].

ყოველივე ზემოგანხილულის საფუძველზე შეიძლება ითქვას, რომ ნიკოლოზ გულაბერისძე „საკითხავსა“ და „საგალობელში“ „ნათლის სვეტის“, იმავე „სვეტი-ცხოველის“, არსსა და საზრისს ეროვნულ-სარწმუნოებრივი თვალთახედვით განმარტავს და მის საღვთისმეტყველო შინა-არსს წარმოაჩენს; ბიბლიური პარადიგმის კვალობაზე „ნათლის სვეტის“ („ცეცხლის სვეტის“) მრავალსაფეხურიან სიმბოლორობას გამოკვეთს და მოხმობილ პარადიგმას ახალი სახექმნადობებით ამდიდრებს. შეიძლება ითქვას, რომ ამგვარი გააზრებით, „ნათლის სვეტი“ ქართველთა ყოფიერებისა და ცნობიერების საზრისი, ეროვნული თვითშემეცნების განმსაზღვრელი და წარმმართველია, მიწიერში ჩამოსვეტებული ღვთაებრივი დედა-ბოძია, „ერად საზეპუროდ“ დასახული ქართველი ერის წინამძღოლი და ცად მიმახლებელი.

¹ იხ. ჩვენი წერილი _ „ნათლის სვეტის“ პარადიგმული სახისმეტყველება „ვეფხისტყაოსანში“ (XII-XVIII სს.-ის ქართული მწერლობის განხილვის კონტექსტში), *რუსთველოლოგია*, 2013-2015, VII, გვ. 7-28.

² იხ. ე. ჩხეიძის წერილი _ რიცხვთა სიმბოლიკა ქართულ ფოლკლორში, *ძიებანი*, XII, 2001.

³ „საზეპურო ერის“ გააზრებისათვის იხ. ნ. სულავას გამოკვლევა `sazepuro eris` _ ნიკოლოზ გულაბერისძე, წიგნში _ ნიკოლოზ გულაბერისძე „საკითხავი და გალობანი სვეტიცხოველისანი“, მცხეთა, 2008.

ლიტერატურა

აბზიანიძე ზ., ელაშვილი ქ. 2012	სიმბოლოთა ილუსტრირებული ენციკლოპედია, ტ. II, თბილისი.
ანდრია კესარია- კაბადუკიელი 1961	„თარგმანებაჲ იოვანეს გამოცხადებისაჲ“, ქართული ენისკათედრის შრომები, II, თბილისი.
გიორგი მერჩულე 1963	„შრომად და მოღუაწებად გრიგოლისი...“, ძველი ქართული აგიოგრაფიული ლიტერატურის ძეგლები, ტ. I, თბილისი.
გრიგოლაშვილი ლ. 2005	დავით აღმაშენებლის “გალობანი სინანულისანი”, თბილისი.
იაკობ ხუცესი 1963	„წამებად შუშანიკისი დედოფლისაჲ“, ძველი ქართული აგიოგრაფიული ლიტერატურის ძეგლები, ტ. I, თბილისი.
იოანე საბანისძე 1963	„წამებად ჰაზოასი“, ძველი ქართული აგიოგრაფიული ლიტერატურის ძეგლები, ტ. I, თბილისი.
ლეონტი მროველი 1955	„წმინდა ნინოს ცხოვრება“, ტექსტი ყველა ძირითადი ხელნაწერის მიხედვით გამოსცა ს. ყაუხჩიშვილმა, ტ. I, თბილისი.
„მოქცევაჲ ქართლისაჲ“ 1963	ძველი ქართული აგიოგრაფიული ლიტერატურის ძეგლები, 1963, ტ. I, თბილისი.
ნიკოლოზ გულაბერისძე 2008	საკითხავი და გალობანი სვეტიცხოვლისანი, გამოსაცემად მოამზადა, გამოკვლევა, ლექსიკონი და საძიებლები დაურთო ნ.სულავამ, მცხეთა.
ნოზაძე ვ. 1957	ვეფხისტყაოსნის ვარსკვლავთმეტყველება, სანტიაგო დე ჩილე.
სირაძე რ. 1992	ქრისტიანული კულტურა და ქართუ მწერლობა, I, თბილისი.
სირაძე რ. 2000	ქართული კულტურის საფუძვლები, თბილისი.
სულავა ნ. 2000	განგების რუსთველური კონცეფცია, შოთა რუსთაველი, სამეცნიერო შრომების კრებული, I, თბილისი.
სულავა ნ. 2008	ნიკოლოზ გულაბერისძე, ნიკოლოზ გულაბერისძე, „საკითხავი და გალობანი სვეტიცხოვლისანი“, მცხეთა.
წერეთელი ლ. 2005	„ძველი დღეთა“ (მამა-ძეობა) დავით აღმაშენებლის ცხოვრებასა და „დავითიანში“, კრებ., თბილისი.